

2 mahasiswa USIM sertai program khas di Oxford

» Program kepemimpinan dedah budaya, kepakaran, institusi Parlimen UK

Oleh Tuty Haryanti
Ahmad Rodzi
tuty@bh.com.my

Bandar Baru Nilai

Dua pelajar Universiti Sains Islam Malaysia (USIM), menyertai program khas kepemimpinan di Universiti Oxford, United Kingdom (UK), mulai Ahad lalu.

Pelajar Sarjana Muda Syariah dan Undang-Undang, Abdul Muiz Abdul Hakim, 22, dan pelajar Sarjana Muda Matematik Kewangan, Muhammad Miqdam Rashid, 22, mewakili universiti itu menyertai Program Student Parliament: Oxford Leadership Programme 2015.

Penolong Pendaftar Pusat Komunikasi Strategik USIM, Mohd Zaini Othman, berkata program itu julung kali diadakan dengan Universiti Islam Antarabangsa Malaysia (UIAM) sebagai peneraju, mendapat



Miqdam (kiri) dan Abdul Muiz bergambar di hadapan St Hugh's College, Universiti Oxford.

kerjasama Kementerian Pendidikan Tinggi serta Akademi Oxford Bagi Pendidikan dan Pembangunan (OAED).

18 mahasiswa terpilih

Katanya, seramai 18 orang daripada kalangan pemimpin mahasiswa universiti tempatan, dipilih mengikuti program selama seminggu itu.

"Program ini bertujuan me-

ingkatkan kemahiran kepemimpinan pelajar dan mendedahkan mereka terhadap pelbagai kepakaran di Oxford, budaya dan institusi Parlimen di negara itu.

"Ini juga dapat menyediakan mereka menjadi pemimpin pelapis masa hadapan yang mampu menyumbang kepada kecemerlangan universiti dan mengubah masyarakat seki-

tar," katanya dalam satu kenyataan, di sini, semalam.

Mohd Zaini berkata, mereka akan mengikuti kursus berbentuk kepemimpinan, kebolehpasaran kerjaya, keusahawanan, khidmat komuniti, selain melawat kemudahan di Universiti Oxford seperti Perpustakaan Bodleian, Kedai Buku Blackwells dan Muzium Oxford.

Katanya, pengisian lain yang amat dinantikan adalah forum bersama Pemimpin Mahasiswa Malaysia di UK yang turut disertai Presiden Majlis Bekas Wakil Rakyat Malaysia (MUBARAK), Tan Sri Abdul Aziz Abdul Rahman, sebagai ahli panel.

Sementara itu, Abdul Muiz yang juga Dipertua Majlis Perwakilan Pelajar USIM, berkata program itu memberi peluang kepadanya untuk mempelajari institusi Parlimen British, transformasi kepemimpinan dan sistem pemilihan Oxford Union.

"Saya tidak menyangka mendapat peluang ini dan akan memanfaatkannya sebaik mungkin," katanya.

Muhammad Miqdam yang juga Presiden Sekretariat Kesukarelawan Mahasiswa USIM pula berkata, segala pengisian yang disusun khas sepanjang program itu, akan diterjemahkan dengan sebaiknya untuk pembangunan ummah dan negara.